



Alþingi
Erindi nr. Þ 132/1090
komudagur 28.2.2006

Reykjavík, 27. febrúar 2006

Heilbrigðis- og trygginganefnd Alþingis
Jónína Bjartmarz, formaður

Vísað er til bréfs heilbrigðis- og trygginganefndar, dags. 9. febrúar sl., þar sem óskað er
umsagnar félagsmálanefndar um frumvarp til laga um tóbaksvarnir, mál. ~~340~~. 388
Álitið sendist nefndinni hér með.

F.h. formanns félagsmálanefndar

Selma Hafliðadóttir
nefndarritari

Umsögn

Félagsmálanefnd hefur borist bréf heilbrigðis- og trygginganefndar, dags. 9. febrúar sl., þar sem óskað er eftir umsögn nefndarinnar um frumvarp til laga um tóbaksvarnir, 388. mál. Með frumvarpinu er lagt til að reykingar í þjónusturými veitinga- og skemmtistaða verði bannaðar með öllu frá og með 1. júní 2007. Meginmarkmið frumvarpsins er að tryggja vinnuvernd starfsmanna, en vinnuvernd heyrir til málefnasviðs félagsmálanefndar.

Nefndin hefur fjallað um málið og fengið eftirtalda gesti á sinn fund: Hjördísi Baldursdóttur frá Eflingu stéttarfélagi, Jakobínu H. Árnadóttur frá Lýðheilsustöð, Niels Sigurð Olgeirsson frá Matvís, Ernu Hauksdóttur frá Samtökum ferðaþjónustunnar og Kristín Tómasson og Steinar Harðarson frá Vinnueftirliti ríkisins.

Til skoðunar koma lög um tóbaksvarnir, nr. 6/2002, og lög um aðbúnað, hollustuhætti og öryggi á vinnustöðum, nr. 46/1980 (vinnuverndarlög). Markmið laga um tóbaksvarnir er að draga úr heilsutjóni og dauðsföllum af völdum tóbaks með því að minnka tóbaksneyslu og vernda fólk fyrir áhrifum tóbaksreyks. Jafnframt skal virða rétt hvers manns til að þurfa ekki að anda að sér lofti sem mengað er af tóbaksreyk af völdum annarra. Í vinnuverndarlögunum kemur fram að með lögunum sé leitast við að tryggja öruggt og heilsusamlegt starfsumhverfi.

Þeir gestir sem komu á fundi nefndarinnar fagna frumvarpinu og telja mikilvægt að starfsmenn á veitinga- og skemmtistöðum sitji við sama borð og starfsmenn á öðrum vinnustöðum, þannig að þessir starfsmenn geti notið reyklauss umhverfis við vinnu sína. Nefndin tekur undir þessi sjónarmið. Bent var á að ef veittar eru undanþágur frá þeirri meginreglu, sem lesa má út úr III. kafla laga um tóbaksvarnir, að reykingar séu óheimilar á opinberum stöðum þá muni þeir starfsmenn sem starfa í reykmettuðu umhverfi ekki njóta þeirrar verndar sem kveðið er á um í vinnuverndarlögunum og því ekki geta starfað í heilsusamlegu umhverfi.

Fram kom hjá fulltrúum Vinnueftirlits ríkisins að almenn ánægja sé með það fyrirkomulag að bannað sé að reykja á vinnustöðum. Í máli þeirra kom auk þess fram að samkvæmt frumvarpinu verði starfsmenn veitinga- og skemmtistaða verndaðir fyrir óbeinum reykingum af völdum annarra, en fjöldi annarra ríkja hefur nú þegar stigið slíkt skref vegna vinnuverndarsjónarmiða. Óbeinar reykingar hafa afar slæm áhrif á heilsu fólks og má í því sambandi benda á greinargerð Lýðheilsustöðvar sem er fylgiskjal með frumvarpinu.

Fulltrúi Samtaka ferðaþjónustunnar nefndi tvö atriði sem nefndinni finnst rétt að minnast á í umsögn þessari. Annars vegar kom fram að veitingamenn óski ekki eftir því að heimild verði til staðar til að hafa svokölluð reykherbergi á veitinga- eða skemmtistöðum. Hins vegar kom fram athugasemd um að þjónustuvæði utan húss sé sérstaklega skilgreint í frumvarpinu, þ.e. í a-lið 2. gr. Telja samtökin slíka skilgreiningu frekar eiga heima í reglugerð en í lagatexta. Í framhaldi af fyrrnefnda atriðinu um reykherbergi, má nefna að fulltrúi Lýðheilsustöðvar benti á að vinnuverndarsjónarmið gildi einnig gagnvart þeim herbergjum því þau þurfi starfsmenn að þrifa.

Rætt var í nefndinni um gildi vísindalegra rannsókna um skaðsemi óbeinna reykinga og fram komu vangaveltur um hvort skerðing á persónufrelsi væri að ræða yrði frumvarpið

N : \ S e l m a \ 1 3 2 \ F É L A G S M Á L A N E F N D \ A N N A Ð
FÉLAGSMÁLANEFND\umsogn-reykingabann-felagsmalanefnd.wpd **I vinnslu**

samþykkt.

Nefndin leggur á það áherslu að vinnuverndarlöggjöfin verður að gilda um allt starfsfólk og standa engin rök til þess að starfsfólk veitinga- og skemmtistaða njóti ekki heilsusamlegs umhverfis við vinnu sína. Leggur nefndin því til að frumvarpið verði samþykkt.